

# INUIT ATAQATIGIIT

## INATSISARTUNI



Nuuk, 19. maj 2014

Inatsisartut Suleriaasianni § 37 naapertorlugu Naalakkersuisunut imaattunik apeqquteqarpunga.

(Inatsisartunut ilaasortaq Naja Nathanielsen, Inuit Ataqatigiit)

### Apeqqutit:

- 1. Atuisut ataavartumik nukissiornikkut atortunik namminneerlutik pilersitsisimasut assigiinngisitaanerisa atorunnaarsinnissaat pillugu Naalakkersuisut ersarissunik pilersaaruteqarpat, nunami sumi najugaqarneq apeqqu-taajunnaartillugu?**
- 2. Akissut naaggamik akineqarpat, taamatut assigiinngisitsinerup attatiinnarnissaanut Naalakkersuisut sunik tunngavilersuuteqarpat.**
- 3. Kangerluarsunnguami nukissiorfimmi kaavittut (turbine) ilanissaannik pisariaqartitsineq sumut killippa aammalu immikkut kaavittuliineq pisariaqassaguni qanoq akeqassava?**

### Tunngavilersuut:

Tanngassimaarutigisinnaavarput pisortat nukissamik pilersuinerata 62 %-ia ataavartumik nukissornikkut pilersitaamat. Nunatsinnilu sumiiffippassuarni inuit suliffiillu namminneerlutik aammattaq seqerngup nukinganik anorimilluunniit nukissiuutinik pilersitsinikuupput, taamaalillutik nukissamik ataavartumik imminnut pilersorsinnaajumallutik.

Atuisut akiliutiminnik Nukissiorfimmiit utertitsivigineqarsinnaapput, ikummatissanik nukissiuuteqarfiusuni ataavartumik nukissiuutinik nukissamik pilersorunik. Taamatullu minguitsumik nukissiornerup atugaanera, ataavartumik nukissiornermik atuiiffiusassaangikkaluani siuarsaratsigu pitsaasuvoq. Kisianni atuisut illoqarfinni ergup nukinganik nukissiuuteqarfioreersuni, namminnerisaminnik ataavartumik nukissiuutinik pilersitsisut akiliutiminnik utertitsinissaminnut periarfissaqanngillat.

Isumaqarpunga atuisunik assigiinngisitsineq tamanna unitsittariaqartoq. Assersuutigalugu nalungilarput nukissiorfik Nuummik pilersuisoq piffissap ilaani artorsaqqajaasartoq, ukiorpassuunngitsullu ingerlaneranni kaavittut sisammertariaqartut, imaluunniit ikummatissat atorlugit nukissiornermik tapertaqartittariaqarlutik. Taamaamat atuisut namminneerlutik ataavartumik nukissiornermik pilersitsinissaminnut kaammattuutaat piissallugu isumaqanngilaq. Ataavartumik nukissiornerup atornissaanut kajumissuseq killilersortariaqanngilarput - siuarsartariaqarluguli.

Apeqqutit ullut suliffiit 10 ingerlaneranni akeqquneqarput.